

The Makuilongdi Express

Liangmai Daily Newspaper

“Mazibo niu ngamne”



Ndaanai paronna khesat mibo TV actress Vaishali Takkar ex-boyfriend Rahul Navlani tu minlu mide. Vaishali gu suicide note ga pagu ex-boyfriend niu patu mimakra jengniu harass thiubo jengniu we chiujiu roukhai diakbo jeng niuwe.

Ukraine ga bambo Indian embassy lamsu ndanai pisikhaibo ladbam sai India maidung Ukraine ga bammai tu majatjiu kasui-suibo jai gasu Ukraine phut lujiu tad milo chiujiu din mide palamra tuhoi Russia nai Ukraine chari mathak makjiu bambo jeng niuwe.



Zengtung 20 Chagaahiu 2022 Kajannai Chiang PO Tamei ,Tamenglong Dist. Manipur Vol.01. Issue 19 Page 1

Tacheng matip maira paliuniu lunibo doune. Chiudi kasa maira paliuniu pingthubo si doune. Kadincham 10:24

Oil pump kasan 'JK Filling Station' MLA Janghmlung Panmei niu lepad khai mide,



Tamenglong Time.

Chag.19: Kadamnai Tamenglong Headquater ga thou kjonbo bam (Oil Pump) kasan 'JK Filling Station' hai Tamenglong A/C gu MLA Janghmlung Panmei niu Chief Guest thiujui lepadbo ten thiukhai mide chiujiu dinne. JK Filling Station hai Bharat Petroleum Company Limited (BPCL) hangga suwe, pabam niu sai Don Bosco High School mungga ye chiujiu dinne.

Rev. Dr. Guingopou Gonmei, Pastor Emmanuel Baptist Church, niu kadpadbo ten thiukhai mide. Thou ronna makjiu Micro ATM di jou tajut jiu raye chiuwe. MLA Janghmlung niu maduiga tacham dinjiu Tamenglong haisi muikhit khit jiu bamme, watheng makbo lungga disu thubo district thiumi sune chiujiu dinne. Paniu dinjiu thou hai quality/standard bamjiu jonkhailo chiujiu khengsan khai mide.

Tacham pikhai nimai bamsai, individual khatdi society/organisation gu sai letter head gasu pikhailo, pahang ga khaibambo phone number ga.

NNPG nai NSCN-IM mai Kolkata ga aruangjiu madin thiucham khai mide.



Nagaland Page. dinne chiudi seminar kumjiu

Chag. 19: Pawan katheng Majibo (Truth), Kuak khaibo khatniu khattu aruang ngam (Forgiveness), Majibo ladjan lakjiu bambo aliu Naga gu (Justice) khatdi Agimanaibo faction dung hai (Peace) lamga makhiam ndaanai, Chagaahiu Zengtung cham khai mide chiujiu 17-18, 2022, Kolkata ga dinne.

NNPG nai NSCN-IM mai Haibo ngamkam hai Forum aruang lujiu madin thiukhai for Naga Reconciliation mide chiujiu dinne. Tachamga (FNR) niu parid luluh jiu dinbo kumsai, kakungbo tadkiu khai bowe. Tadmibo chamsui ra luson lumakge N-genhiu ga aruang lujiu chiujiu ladchap

Manipur Uiversity gasu pad mira CM Biren niu Assam Rifles khuga kheng khai mide.



Chag. 19: Chief Minister N Biren Singh niu ndanai Lt General PC Nair, director general of Assam Rifles khuga Manipur University campus ga Assam Rifles camp kabambo si pad mira khengkhai mide chiujiu dinne. Assam Rifles nai Manipur University niu organised thiubo Northeast seminar, City Convention Centre, Palace Compound

ga “Future Ready Manipur-looking Beyond Ethnicity & Insergency” chiubo ladpui hangga maniabo program ga panui tacham dinjiu Manipur University gasu pat khailo, pageng bambo mania pabam pakhiangna government niu akhi khai ne chiujiu din mide.

Haibo seminar hai session nia thiujui tadkiu jiu , karaibo cond. in p.2

Senior Congress leader Mallikarjun Kharge niu kasanbo Congress president phung mide



Agency New Delhi

Chag. 19: Ndahnai Congress party gu papi leng kadajui secret ballot gasu vote khaikiu boga senoir Congress leader Mallikarjun Kharge niu panai contest kambambo Shashi Tharoor gasu vote 6825 nkiujiu vote kiujiu Congres president bamphung mide chiujiu tacham ga dinne. Ndanai Kadamnai vote hai 9385 hai khaikiu bowe siga Mallikarjun Kharge niu 7897 votes douwe sigasu Shashi Tharoor niu 1072 votes douwe khatdi 416 niu invalid tad mide chiujiu Central Election Authority chairman Madhusudan Mistry niu dinne.

Takum 24 kumbo Gandhi kikhun niu president hai phungwang lubo sai thainai mien niu Gandhi kihnah mai makboniu phung lanjiu bambo we chiujiu dinne. Congress president phung matheng thubo Sonia Gandhi tu panui malin lanmi sune.

Karingting Lunlung



@@@Chapoubo, nang dega Chagaa ra! Makuilongdi ramah Tamei gala?

###Chiuni paren tura akiga chagaa gup tane, tataaba!

Aruangsai aliu chapne, chiudi zanpad misai aliu koune.

Editorial

Aliu Liangmai gu lunlung phuikhaibo ga chuncham lulakbo maksai chuncham kungbo hai ngoupadle. Thainai miendi aliu mathiu chunwi jiu Chagaa chamkhe chiujiu kangkhat mainiu macham padbam pake khatlam tamjiu marangpad lan chiubo hai ndebo ga wangtang maklo chiubo di makum mak saye. Kamikga chiabo kumsai karaiga mai chaga ra rangmakbo wanga chaga ra marang subo bow bamjiu paphi donsou khaibo bow tu mangai jiu patonlam maksai dikhang wikhang sudi papou thiuni mibo kumjiu karaiga macham pad rai maitu mangai mijiou chalung makbo chamdi chiubo bamme. Haikumbo hai khat khat tu kuak khai lujiu mathiu khat thiujui changam kamsai mainiu di agu jat siam bamdi charaubo bamme. Tuhoi phung bambo committee maiddi masuang phungsu khai mibo maitu palun siji chakhuang thiukhai khatdi karaidou phungsu khai mimai di tuhoi gu committee mai tu siji chakhuang thiukhai jiu kawi thiulu changee chamkhe, pawan bamkha ye. Wilura jengniu khat-khat gu kamoubo phumi tukhe.

Liangmai Ringthenlo Manipur University gasu pad mira CM Biren...

condt. from p.1

session hai Jaideep Saikia niu 'The Troubled Neighbour - Turbulent Myanmar' chiubo lamga jukhai ye. Paniabo session gahai veteran Lt Gen K H Singh (Retd) niu 'Past v/s Future: Shedding the Historical Baggage in Manipur' chiubo lamga jukhai mide chiujiu dinne.

Haibo seminar ga Consumer Affairs Food and Public Distribution, L Susindro Meitei; Lamlai AC gu MLA KH Ibomcha Singh, Assam Rifles gu senior mai khatdi ariaknah mai wajiou wangjiu padam lukhai mide chiujiu tacham ga dinne.

LIANGLAD RAORA SIOLEN KHAIBO - WEEK 2

Source: LLS (M) Liangmai Orthography Guideline, 2022

Tadmibo nidkak ga Lianglad raobo wan ga thinpiurabo pagiak (symbol - consonant/vowel) lenkhaide. Thainai Lianglad raobo ga kaku-kanabo khon (tone) hai dechiubo zaiga raokhai ra lo chiubo phuine. Tone chiusai samjiu dinbo ga Music ye. Haibo tone niu chaladkeng gu paramba kam tambo bamme. English kumbo ra Tone Language makge. 'love' chiubo ladkeng tu kakubo khon ga dindi, kanabo khon ga din tadi, paramba kali makge.

Liangkhon ga, samjiu dinbo ga, tone level sum bamme. Palingbo ra madai ye chiudi pamadaibo khon, chiubo ra chaladkeng madai (Quadruplet) pakhon ncham ram lujiu kabambo keng makge. Chiudi sum (triplet) ladkeng khatdi n-nia (pair) ladkeng si kengnge. Triplet chiusai, len (fly), len (show), len (spread disease, etc) haibo dung si ye.

Dechiujui kaku-kana tu kam tasi ralo? Pakhon kakubo tu kanambo giak (letter) situ 'doubling' pi thiukhailo. N-gang ga bambo khon (mid tone) tu wadi kam tasi tulo. Pakhon kanabo khon tu ladkeng kanambo ga 'h' symbol raokahilo. Padon next issue

OFFICE OF THE LIANGMAI NAGA COUNCIL, MANIPUR Dated 19/10/2022

MATHIUTU PISIKHAIBO

Chakhuang thiujui bambo kating kanah Liangmai mathiutu Liangmai Naga Council Manipur Office lamsu chunwibo poupad khaiye.

Government niu "CHAGANGEE" hai situ restricted State holiday chiujiu Chakehiu 2nd 2021 ga senpad khaihibo kum, khatdi Annual Assembly Makuilongdi gasu Chamsui riak 3 gadi suikhai mibo kum, Chagaahiu 30th 2022 bonai Apou Apeh ram Makuilongdi namga aliu Liangmai Mathiu gu thiujui wang madui lujiu Kadampou Tingwang tu thuankiubo joujiu Chaga Ngee haisi manit khe chiujiu rangkhai bamme.

Siniu mathiusi kakheng thiubo nai chamjiu mathiu 9th State Level Chaga Ngee Committee mainiu rangkhai bambo program ga namgu Chairman khatdi Authority mainiu parid lukhai lujiu namnahmai tu majang wang makeng khaijiu pi palun piwi khaine chiubo malumme. Mathiu maning makung khaijiu rangkhai bambo program situ agunjiu acheng ariak situ kam madi khai sune chiubo malumme.

Thonne.

Mathiu ngamga

Liangmai Naga Council Manipur.



"THE BLESSED FESTIVAL"

TAMEI HQ. CHAGAA NGE

JENGTUNG 30/10/202 (NIDNAI)

Pawan : 10:00-2:00pm.

Pabam : R.Tale Mapui Shenky

Tacham Dingpao:

Rev.Z.Mairilungbou Newmai
Former Executive Secy. LNBA-M

Jukhaira : 1. Lp.Jelmi Abonmai
2. Mn.N.Jantadbou

NNPG nai NSCN-IM mai Kolkata ga aruangjiu...

condt. from p.1

khai mibo "masuang jonjiu tadngut ra" chiubo ladchap tu suikhaibo nai nchamjiu Council of Naga Relationships and Coopertion chiujiu form thiukhai mide chiujiu dinne. Haibo maduiga Naga National Political Groups(NNPG) gu Convenor N Kitovi Zhimomi khatdi National Socialist Council of Nagalim (NSCN-IM) gu Vice President Tongmeth Wangnao niu majang jiu tadkiu khai mide chiujiu dinne. Paliu gu tacham ga dinjiu Naga maidiu maida mai mathiu di chunchamjiu nkhaijiu pasai Naga mai muisu ra leng karam ncham bamkhe chiujiu dinkhai mide.

Diukiuram namga manam tadbo gasu kam moujiu khangkhat tu chaganmi niu kepsat mide.

TME Tamei

Chag. 19: Ndanai dikiuram nam mai manam tadbo gasu paliu karai kam moubo gasu mai khangkhat tu chaganmi niu kepsat mide chiujiu dinne. Manu Phuikambou, pa tingkum 40 ningga bambo panah khangkhat lung mibo piu hai manam tadbo gasu pakaa mainiu kammoubo gasu jengdiu mide. Pahai origin ra Kuilong nam gasuwe chiujiu dinne. Kashaipum kaluangga phungwang tangjiu bam mide chiudi tathu ra chia makhaye chiujiu dinne. Haikumbo chamou chamen padbo ga sang namdah mai dungdi wira mathiu aruangjiu chiakhai sai pathou sune chiujiu parammai khangkiang khangkhat niu tacham luboga dinne. Tathu hai thainai suisai jibijiu chia miraye chiujiu dinne. Sikhai suiye haikumbo chamou chamen padbo ga kikhun mainiu chalung dikhaijiu kuakkhaibo ri kaki haye.

Khengkhaibo

Mailad gasu chalibo kakeng bam jengniu chali wangtang makbo khatdi khaitang makbo wajiou bamdi mathiuniu understand thiukhai ra mide chiujiu khengkhai ye.